

ТРАКТОР

Таабайнь зээ хүбүүнтээ үдэр бүри наададаг, тэрээндээ номуудыг уншажа үгэдэг байба.

Нэгэтэ табатай зээ хүбүүнийг иигэжэ хэлэбэ:

— Таабай, таабай-аа, ДТ-75 түхэлэй трактор боложо наадая!

— Хэмнай теэд трактор боложо шадахаб? — гэжэ таабайниинь һонирхобо.

— Тамнай трактор болоходоо зохихо байнат: трактор шэнги томо бээтэй, гаһаяа зуугаад, үдхэн хүхэ угаа бааюулхат, олиггүй шангаар түршэгэнэхэт, пиршаганахат.

Таабайниинь диван дээрээ һуугаад, гаһаяа һоросогоон, пад хара угаа бааюулан, бүдүүн хоолойгоор "тур-нир, тур-нир" абяа гаргана. Дүтэхэнэ хараад байһан Зоригто таабайдаа иимэ заабари үгэнэ:

— Трактор диван дээрэ һуудаггүй, тиимэхээ пол дээрэ үбдэглөөд, хоёр гараараа тулаад һуугты!

Таабайнгаа дүрбэн мүсэ дээрээ һуухатай сасуу, Зоригто нюргандань гаража һуугаад, ёһотой тракторист шэнгээр нүдэндөө хара шэл зүүнхэй, абынгаа арһан бээлэй баринхай, малгай үмдэнхэй, таабайнгаа хүб хүхэ угаа бааюулхадань, "тур-нир, тур-нир" гүүлэнэ.